



UKA2013/72

12. november 2013

Harald Bianco

Ukioq 2015 pinngitsaaliinermut akiuiniarfittut ukiunngortinneqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Jens B. Frederiksen, Demokraatit)

Inuit Ataqatigiit isumaqarput annersaaneq pingitsaaliineq sunaluunniit inummik innimiillisaarneq akuerineqarsinnaanngitsoq. Timikkut tarnikkulluunniit annersinneqarneq inunniq sanngiillisitsisarpoq, inuaqatigiinnilu pingitsoorniagassaaajaannassalluni.

Siunnersuuteqartoq Jens B. Frederiksen, Demokratit siunnersuuteqarneranut qutsavigaarput. Siunnersuummini qitiutillugit eqqarsaatigisai tassaapput, arnat angutilluunniit pinngitsaalaallutik kinguaassiutimikkut atornerlunneqarsimasut.

Soorlu siunnersuuteqartup ersersikkaa, nunatsinni taama pineqarsimasut amerliartorput. Tamanna pissusissamisuunngilaq, takutitsillunilu inuaqatigiinni kinguaassiutitigut pissusilersoqatigiittarnermi ajornartorsiuteqartugut annertuumik. Ajornartorsiut ukiorpassuarni atuussimasoq, inuaqatigiinnilu ilisimaneqaraluarluni annerusumik, ilutsinni aammalumi naalakkersuinikkut, qanoq iliuuseqarfingineqanngitsoq.

Ukiuni kingullerni nunatsinni naalakkersuinikkut, meeqqat aammalumi inersimasut, kinguaassiutimikkut kanngutsaattuliorfigineqarsimasut annertuumik eqqumaffigineqarput. Taakkua sullinneqarnissaat anguniarlugu, meeqqat katsorsarneqartarfissaannik pilersitsivugut, maannalu suliassaq tullinnguuttoq tassaasoq, inersimasut kinguaassiutitigut kanngutsaattuliorfigineqarsimasut, inersimasunngorlutik kingunerluutaasunik nammagaqartut, aaqqissuussamik suliniarfingineqalerlutik.

Tamanna pingaaruteqarluinnarpoq inuttut atukkat, kanngutsaattuliorfigineqarsimanerup kinguneranik artornartunngorsimasut inuttut ataasiakkaatut, aammalu ilaqtariittut ingerlalluarnissatsinnut kilersuisuusarmata.

Inuit Ataqatigiit isumaqarpugut pingitsaaliisarneq inuaqatigiinni ammasumik oqaloqatigiissutigineqartariaqartoq. Oqaloqatigiissutigisariaqarparput pinngitsaaliisarnerup

unitsinneqarnissaa. Oqaloqatigiissutigisariaqarparput pinngitsaaliineq inuiaqatigiinni akuerineqarsinnaanngimmat. Oqaloqatigiissutigisariaqarparput pinngitsaaliineq qanoq pinaveersaartitsigisariaqaripput. Sunaluunniimmi ammasumik oqaloqatigiissutigineqartoq pinaveersaartitsinermik ammaassisarpoq.

Taamatut oqaaseqarluta Jens B. Frederiksen-p siunnersuutaa, qulequttamisut qulequtalik akueraarput, siunnersuullu Peqqissutsimut Ilaqtariinnermullu Ataatsimiisitaliamut ingerlateqqipparput.